

四庫全書

集部

欽定四庫全書

集部

薜荔園詩集卷三

詳校官監察御史_臣周元良

侍讀_臣孫球覆勘

總校官中書_臣朱鈐

校對官中書_臣吳甸華

謄錄監生_臣黃佑

欽定四庫全書

薛荔園詩集卷三

明 余翔 撰

七言絕句

春日送立雨叔讀書赤橋

四首

花發江城二月天
木蘭流水赤橋前
扁舟載得青箱去
揚子亭中日草玄

其二

柳色陰陰映白塘
滄浪萬頃浣花香
試看劉向傳經處
夜夜青藜照草堂

其三

一瓢春酒聽流鶯
花外停梳見友生
醉藉堦前書帶草
幾迴仙掌夢金莖

其四

漢家見說啓青宮
少海談經詔九重
此日蓬門須努力
未央鳴珮聽晨鐘

送江參軍還金陵

三首

十載京華白髮生
歸來海上結鷗盟
長江春水桃花發
又逐孤帆下石城

其二

三月楊花撲酒香
扁舟春水別河梁
銷魂漫擬江淹賦
家住金陵亦故鄉

其三

金闕連雲壓翠微
先皇勅賜有光輝
欲隨絳節朝元去

目斷天心一鶴飛

遊仙寺

幾度探春路不迷尋僧又過竹林西
深山盡日無人到雙樹陰中一鳥啼

贈王弇州先生

七首

一代文章擅國工弇州四部古誰同
自從授得刀圭訣名在丹臺玉籍中

其二

星羅北斗照乾坤七子先朝集薊門獨擁金仙朝五岳
至今誰不讓崑崙

其三

詞賦流傳遍九垓嶽崎歷落見仙才若非長史人間住
滄海誰看水一杯

其四

齋心日禮上清家王母書傳萼綠華欲拜下風稱弟子
鍊成勾漏舊丹砂

其五

詔起西曹法從班殷勤累疏乞東山謝公總繫蒼生望
邴得明時但閉關

其六

絲綸日下九重頻耆德三朝重老臣若學五湖遊不返
漢家誰復畫麒麟

其七

神如秋水映芙蓉懶著朝衣聽曉鐘笑問仙風誰得似

茅家兄弟跨雙龍

題立朝叔亭子

三首

一庭春色報芳菲
酒熟牀頭鱖乍肥
但得看花頻中酒
百年長製薜蘿衣

其二

座上青山一片孤
夜來月白似冰壺
接羅倒著如泥醉
不管傍人說酒徒

其三

白眼猖狂避世心
蓬池誰解阮公吟
仲容亦是逃名者
濁酒相看竹下斟

贈汪魯狂

仙人跨鶴下黃山
曳杖逍遙天地間
曾採三花棲少室
即今白髮駐紅顏

劍浦對月呈陳觀甫

津口潺湲萬壑哀
城頭玉女弄珠來
依然獄底雙龍劍
千載何人復姓雷

春暮留雲閣感懷

二月花間黃鳥啼
看花人去草萋萋
白雲猶似能留客
一片飛來雨石西

其二

東山春色掛城頭
依舊雲霞檻外浮
別墅彈棋聲寂寂
羊曇雙淚為誰流

其三

烏石山前草閣孤
風流曾集竹林徒
重來多少傷心事

眼底山河邈酒壚

春日寄懷陸使君

郡閣三年集鳳凰
潁川經術漢循良
翩翩車騎趨朝日
共識司徒舊省郎

其二

桑柘春生十萬家
蓼蕭賜燕日光華
閩南父老應相慰
行雨還來太守車

其三

木蘭陂上麥如雲
露晞風流憶使君
一自單車俄入郡
謳歌何處不相聞

其四

計吏從容下建章
紫衣春染御爐香
乘風若渡巴陵水
莫為江魚戀武昌

其五

白雪泠泠和者稀
郢中雲樹望依依
微漢陽春水茫茫綠
何處仙帆一片飛

懷柯堯錫

文藻翩翩錦不如江湖風雨悵離居
長卿不是臨邛客誰向雲霄薦子虛

贈林敷毅

何人意氣薄青雲公子翩翩獨有君
客到高齋頻下榻一尊風雨細論文

其二

楚楚聲華動五陵清標直似玉壺冰
交遊不少縱橫客

最愛風流御李膺

雨中招廷珍

細雨飄來二月花
美人何處闕豪華
囊中剩有青銅在
遲爾南隣賣酒家

送蔡比部

二首

才名矯矯擅談天
瘴海風塵謫幾年
憔悴無勞漁父問
三閭心事總堪憐

其二

天涯猶自夢鷓鴣
班彭蠡風高一雁還
行色蕭條無長物
逢人但說武夷山

題南山寺

山色迎人興不孤
白雲片片散浮屠
一尊濁酒拚沉醉
箕踞山間聽鷓鴣

和鄭給舍七夕對雨 二首

木葉蕭蕭送雨聲
明河風浪暗中生
人間盡道天孫巧
機杼空含此夜情

其二

飛來暮雨妬嬋娟
隔歲星期一水懸
却恨雲間青鳥使
銜書不向月中傳

豐城舟中有感

城下江流帶夕暉
城邊雲樹望依微
當年獄底雌雄劍
不識今從何處飛

贈陳克勳雲來閣

二首

梅峰山下草堂清
書帶參差繞砌生
一自青藜分太乙

彩毫何處不縱橫

其二

結屋壺公興有餘
滿牀堆得讀殘書
即今不盡南陽淚
雲滿空山一草廬

題翠漪亭

草閣玲瓏俯碧池
翠雲低壓萬年枝
牀頭濁酒葡萄色
醉倒山公白接離

別林及甫

歲暮相逢雨雪多。春風曾奈別離何。
解衣不為壚頭酒。白眼看人一醉歌。

其二

按劍風塵祇自愁。嗟君也做黑貂裘。
懷中十五連城壁。不是相知未可投。

題元妙觀五松

誰種長松禮斗壇。五株曾否拜秦官。
涼風吹上松梢月。影落龍鱗片片寒。

贈別陳本容

六首

東風乍轉柳條新
爾去重揚薊北塵
擊筑若逢屠狗者
酒中誰是和歌人

其二

陳遵結俠起高名
尺牘題來慰友生
不比當年驚座者
風流到處動公卿

其三

囊裏惟藏烏篆文
江湖誰不識夫君
北游燕趙南吳楚

奇字偏勞問子雲

其四

筆陣相傳自永和右軍書法更誰過黃庭寫贈清狂客
不為山陰換白鷺

其五

沽來濁酒意如何半醉當筵一放歌江上千條彭澤柳
不知曾似客愁多

其六

桃花美酒醉名姬
裘馬長安二月時
妻子鹿門歸自好
天涯風雨莫教遲

題清樾軒

結得高齋賦考槃
林間新著竹皮冠
白雲猶帶蒼梧色
散作清陰六月寒

素使君平冠歌

五首

南國烽烟擁二酋
皖城千雉望旄頭
地當三輔驚多壘
誰向軍中借箸籌

其二

幕府臨戎氣拔旌櫓槍入夜照連營佩刀直抵沙中去
誓斬鯨鯢一洗兵

其三

潢池何事弄干戈陳漢山中嘯聚多不是使君承廟畧
居人曾奈麥秋何

其四

天柱崔嵬控上游長江東下塹皇州荆舒一戰韃靼臥

南顧無勞聖主憂

其五

綠林掃盡凱歌還
父老壺漿皖水邊
見說禁中思頗牧
試看勲業上凌烟

義帝陵

牧羊何意起民間
禍隱當年遣入關
千古興亡君莫問
江東曾見一人還

望廬山

廬岳峻嶒五老峰鄱陽秋水浸芙蓉
凌風欲挾飛鸞去坐聽天池萬壑鐘

贈別吳文中

四首

逍遙初謁武夷君玉女峰頭弄白雲
歸去扁舟圖九曲幔亭仙樂夜深聞

其二

南國山川似洛中官橋截海駕長虹
螭螭正美新荔熟繫馬壚頭醉晚楓

其三

黃花采采報重陽人在天涯憶帝鄉
貌得西方金粟影大江東去泛慈航

其四

吳郎歸騎入長干窈窕佳人咏合歡
若問荔枝何所似胭脂香染水晶寒

象教精舍為孔陽宗作

金仙何日至西方七寶林開古豫章
見說自焚三昧火

至今時現玉毫光

寄吳任德

溪流日暮鎖寒烟
石馬橋頭夜泊船
不識名園開曲水
懷人幾度對嬋娟

金陵曲四首贈大司馬吳公

秣陵宮闕舊長安
車騎如雲擁漢官
司馬勲名深帝眷
貔貅千萬獨登壇

其二

石頭虎踞壯金城江左仍屯七校兵樽俎從容多妙畧
樓船十萬淨長鯨

其三

鬱鬱鍾山王氣高長江天塹北通漕吳公身繫干城寄
鐘鼎何論汗馬勞

其四

秦淮水接海門潮北望燕山似九霄文武東南功第一
尚方劍履賜趨朝

寄黃明府

溪水泠泠日欲斜
孤蓬晚泊亂啼鴉
不知三徑行吟處
猶有東籬未吐花

望蘇門

黃河中斷太行山
一望烟雲縹緲間
欲問蘇門鸞鳳嘯
即今惟有水潺湲

大田道中懷孟擔

幾灣流水咽涓涓
五虎山青馬首懸
欲訪故人過峽口

南鴻猶自帶風烟

渡峽寄堯衢

峽江片片錦帆開
誰抱凌雲作賦才
遲爾鳳凰山下客
乘風還上釣龍臺

范子受宅賞牡丹

誰家亭榭似平章
花媚東風冠洛陽
客到但傾光祿酒
撲衣何處不天香

咏荔枝

絳囊顆顆隱珠胎不向風塵馳騎來自劈凝脂沉碧水
大秦明月掌中迴

寄沈靈翊

片月亭亭掛碧霄扁舟夜趁海門潮風流何處思公子
寒倚花前鬪柳腰

題立雨叔餐秀園

四首

春生薜荔翠交加高捲湘簾覽物華一曲溪流堪濯錦
有時流出武陵花

其二

竹香細細午風柔
高枕滄浪事事幽
散帙揮毫過白日
嚶嚶灌木鳥相求

其三

一室多藏小酉書
草名書帶滿庭除
夜來太乙高相照
彩筆如椽賦子虛

其四

濁酒誰知大阮心
蓬池無日不清吟
仲容亦有銜杯興

散髮頻來醉竹林

春日送家大阮讀書城中

春風拂面意何如
柳色黃金映別裾
十里江城從此去
枕邊惟有伏生書

馬用調草堂觀妓

四首

園林寒色淡平蕪
公子邀歡興不孤
一片烟波清似鏡
不知載酒在西湖

其二

高閣臨流錦席開一時詞客共徘徊雕闌徙倚看山遍
笑折黃花進酒杯

其三

紅粉當筵鬪綺羅樓臺倒影漾微波池頭雙鶴聲相和
似解佳人白苧歌

其四

一林脩竹護柴門城市棲遲似遠村但得三千珠履客
不妨十日醉平原

經白鷗園有感

池塘依舊隱漁磯
竹徑蘭皋車馬稀
黃犬無勞傷往事
鈴山惟有白雲飛

秣陵逢孫子真感其先酒樓事賦而贈之

江左佳人說莫愁
逢君慷慨問壚頭
六朝勝迹無尋處
湖上猶傳舊酒樓

題程君衡扇面

桃花似鬪美人妝
掌上看來興未央
翠羽却憐春色好

欲銜花片報劉郎

贈吳應祈 二首

囊裏多藏汲冢文
有時獨運郢人斤
但看鼃負千秋色
奇字何勞問子雲

其二

吳楚名山快遍遊
瑤華何處不雕鏤
狂來欲借成風手
勒牘仙人十二樓

題沈純甫綠蘿莊 四首

疏乞還山別漢都知君踪跡寄菰蒲從陶偏笑鴟夷策
何似君家長五湖

其二

豈為長生賦采芝二毛心事少人知沈郎不問腰消瘦
興到還裁八咏詩

其三

嶺海當年謫戍身歸來舊業白雲貧一區寂寞玄堪草
載酒時來問字人

其四

結筇此地意如何書著名山副墨多纔見條桑蠶事起
西湖又聽采菱歌

題武彛

六首

騎來竹杖似飛龍欲乞金丹訪赤松三十六峯青不斷
仙人何處採芙蓉

其二

溪上扁舟鷗鷺羣凌風初謁武夷君幔亭深處松濤起

彷彿釣天隔水聞

其三

溪流九曲漾霞標
路入桃源一水遙
忽聽雲間吹玉笛
鸞輿飛度綵虹橋

其四

采秀朝來汗漫遊
松風五月冷龍湫
山中道士如相識
騎鶴招余到十洲

其五

尋真直到上清家小藏峰頭對月華
仙分吾生應不薄
親承玉女飯胡麻

其六

烟霞五色幻仙臺
瑶草千年碧洞開
一自仙人分石髓
乘風萬里去還來

晚眺

竹林秋色入黃昏
溪水新添雨後痕
明月不來人語寂
數家漁火點江村

送陳叔理之會稽

名其翰公同年
友襄陽知縣

談經遙向越王臺
紗浣西施絳帳裁
若到稽山探禹穴
千年蝌蚪破莓苔

其二

蘭亭曲水試經過
袂袂相傳晉永和
寫得黃庭經一卷
山陰明日又籠鷺

題九鯉湖

雷轟

水晶宮殿壓青山，隔斷紅塵霄漢間。
湖上雷聲轟不住，長疑仙子駕龍還。

瀑布

寒泉瀉下紫霄來，一道潺湲萬壑哀。
可是仙人遺匹練，至今猶掛白雲隈。

珠簾

一片珠簾障玉樓，垂虹為帶月為鉤。
怪來不作尋常夢，鸞鶴分明到十洲。

玉柱

仙人何處弄烟霞
十二樓臺別有家
依舊當年雙玉柱
擎天半倚白雲斜

石門

雙扉寂寂護蒼苔
幾片浮雲洞口來
笑探三花從此去
不知何處是天台

五星

懸崖千樹畫冥冥
一片潭光聚五星
我欲齋心看道錄

移來午夜照踈櫺

飛鳳

何物沉冥不可招
九苞曾說跨王喬
只因誤啄金丹粒
謫落人間聽玉簫

棋枰

仙子乘龍去不還
棋枰猶自閣人間
不知千載爛柯後
又著蓬萊第幾山

將軍

辟穀仙人不可從
雲山彷彿武夷蹤
將軍不是封侯骨
也學文成訪赤松

劍浦夜泊

睥睨飛來片月孤
扁舟何處問當壚
寒潭水冷雙龍伏
猶有豐城劍氣無

寄沙門心印

一別頭陀意萬重
白雲何處寄禪蹤
夢中不辨長千里
猶記山門一古松

明妃曲 四首

燕支一望白雲秋
馬上紅顏雙淚流
雁自南飛人北去
琵琶不解漢宮愁

其二

北風吹雪暗天山
憔悴蛾眉去不還
薄命便教邊地老
歸魂應度玉門關

其三

朝辭合殿暮交河
淚滿宮衣漉素波
顧影自憐腸欲斷

長門幽怨較誰多

其四

青海寒雲散作風
誰憐粉黛逐飛蓬
亭亭一片中天月
彷彿清光照漢宮

春日口占

春風昨夜到漁家
江曲濛濛細雨斜
可怪宅邊桃李樹
朝來不語自開花

題李孚台白水亭

二首

萬頃烟霞一草亭
開樽醉殺柳條青
停杯試問滄浪水
龍臥寒潭幾日醒

其二

湖上何來碧浪高
雷轟風猛怒相號
任公不是尋常手
欲下滄溟釣六鰲

送李太守歸鄉八首

郭外曾隨竹馬迎
春風何事動離情
不堪誤得中山謗
歸與沙鷗結舊盟

其二

參差柳色映旌旗冠蓋如雲獻酒卮
莫怪萋菲成貝錦
六宮自古妬蛾眉

其三

宦遊蹤迹漫西東參破元機萬劫空
留得甘棠春勿翦
木蘭陂上一壺公

其四

文藻風流似李邕下車偏自問龍鍾
若非雨露沾枯槁

那得寒山數畝松

其五

萋萋芳草怨王孫
風雨千山暗淚痕
蘭佩自憐綠帝子
江潭心事許誰論

其六

花間睨睨轉黃鸝
彭蠡風高片席移
別後相思千里月
投珠無計轉堪悲

其七

郡齋下鳳潁川同失馬無勞嘆塞翁階下凌雲叢桂發
天香高占廣寒宮

其八

拂衣歸去鬢如班草得玄經合閉闌多少匡時籌未展
還看安石起東山

夜合花

風動香飄十二欄雨中相對一尊殘玉容莫向黃昏斂
正欲攜燈醉後看

雨中杜鵑花

何來杜宇葉離離三月當庭花滿枝
莫是啼魂哀帝子至今香染濕胭脂

白蓮

一朵芙蓉百和香華清浴罷試新妝
幽姿自分無泥滓不用臨風妬六郎

題畫蘭贈張子升

萋萋蕭艾豈為羣秀色曾從九畹分
采得芳菲堪作佩

臨風只合贈湘君

畫竹

太湖石畔竹陰陰
影動涼飈曳玉吟
莫問渭川千畝處
蓬蒿一徑白雲深

畫菊

采采黃花浥露香
眼中彷彿對柴桑
風流誰送先生酒
共坐南山醉夕陽

弔屈大夫

汨羅江畔草蕭疎千古懷沙恨有餘日暮哀猿正淒切
不知何處弔三閭

許由墓

平原四望草離離箕潁風高見石碑不是當年輕萬乘
一坏千載有誰知

悼內

五首

繡佛齋中夢乍醒悲風吹月透疎櫺蓮花不見參禪者
冷落牀頭數卷經

其二

高樓無復試紅妝
塵掩香奩淚涕滂
竊藥便教奔月去
廣寒那得畫眉郎

其三

一夜愁來鬢有絲
吹簫人去見無期
悼亡不盡潘安淚
忍讀生前幼婦詞

其四

茫茫大塊竟何之
雲雨巫山夢轉疑
伏日縱然先割肉

恢諧歸去欲遺誰

其五

鴉噪空庭片月光攬衣中夜起徬徨眼中搦管人何在
淚滿當年札數行

仙溪夜泊懷鄭山人

孤舟微月倚前灘
設設松風入枕寒
何處懷人耕谷口
一溪流水夜漫漫

寄吳山人

隱隱松蘿海月孤溪邊何處問當壚故人不斷雲山夢
欲乞仙厨五岳圖

送陳生遊燕

與君握手醉吳姬雪滿天涯惜別時明日悲歌燕市裏
不知擊筑更逢誰

題姚媿州明府園亭

二首

五柳先生懶折腰歸來踪跡溷漁樵角巾漉酒東籬下
還赴蓮花社裏招

其二

亭對青山一水分
隔林啼鳥靜中聞
若非寂寞耽奇字
載酒何人問子雲

武陵別諸君子
余戊子春客武陵時與諸君子作
湖山遊甚適
天涯春盡忽爾懷歸各別一首聊

感離索

索履善

白髮相看感歲華
西湖三月醉桃花
錢塘江上東風起

一片飛帆即海涯

鄔汝翼

叢林幾度問新詩
風雨天涯又別離
君自六橋余九曲
愁心惟有白雲知

吳公簪

移來短榻傍浮屠
坐上青山興不孤
一片白雲愁聚散
夢隨明月到西湖

錢季善

杯酒春風數往還一朝興盡別青山
愁來湖海無知己
草得玄經合閉關

余鞠夫

春城杯酒共銷愁醉裏題詩月滿樓
雙淚不堪風雨別
桐廬江上一孤舟

鄔章文

乍別雲間又武陵重逢笑問橐中金
天涯芳草春將盡
愁殺王孫萬里心

七里灘別余鞠夫

二首

山自盤龍七里來，客星高傍白雲隈。
灘頭無恙東流水，誰著羊裘上釣臺。

其二

武林春色日初遲，花滿壚頭酒滿卮。
無奈雙龍愁裏別，綠楊幾度嚙黃鸝。

送屠長卿還四明

七首

詞場杯酒數交歡，不謂都門便掛冠。
可是風塵遊已倦，

孤臣雨雪出長安

其二

蕭條書劍別吾曹
回首鵷班建禮高
不是三閭才見忌
千秋誰見楚人騷

其三

車騎如雲結五都
少年誰不避呼盧
故鄉明日黃冠去
曾否君王賜鏡湖

其四

蹀躞初登郭隗臺
無人不道是龍媒
悲鳴敢謂恩中斷
九折羊腸祇自哀

其五

傾國佳人自若耶
眼如秋水貌如花
吳宮一出歸何處
溪上傷心舊浣紗

其六

四明有客擅風流
碣石談經隘九州
官罷不須嗟怪事
人間何物是千秋

其七

誰憐才子似飄蓬
歲晚扁舟下海東
見說鄞山堪避世
采芝歸問夏黃公

黃山七景

石牀

綵霞為幔石為牀
玉女吹簫下鳳凰
不到名山深採藥
桃花邨復問劉郎

天都峰

青山壁立闢青蓮列嶂霞標駐列仙安得乘風之帝所
雲門咫尺聽鈞天

白龍潭

龍湫萬片白雲寒中有玉龍日夜蟠長嘯一聲龍欲起
明珠如月鏡中看

浮丘壇

仙壇高與白雲平呼吸翛然達太清欲借浮丘珠樹鶴
月明緌嶺坐吹笙

丹洞

石洞雲深白日寒
鼎中砂熟跨飛鸞
若教解得刀圭訣
何處烟霞不可餐

湯泉

山中赤水瀉蓬壺
水底元珠竟有無
濯髮振衣堪謁帝
長生殿裏合靈符

桃花溪

山下溪流曲曲斜
春風吹落武陵花
漁郎若問桃源路

雞犬雲中別有家

送陳子策之金陵

江南芳草媚春情
杯酒花間別友生
若到金陵將母去
盧家少婦笑相迎

送鄭諫議之滇南

四首

保障西南借楚材
除書新下越王臺
懸知叱馭天涯日
萬里風清瘴癘開

其二

車馬翩翩度七盤
蠻王負弩漢衣冠
紫薇花映昆明水
多少樓臺鏡裏看

其三

夜郎西去古梁州
使者登車豈薄遊
金馬碧雞勞祀事
漢庭千載見風流

其四

武昌明月暫停輶
又度蘭津十二橋
興到縱橫裁郢曲
和鳴莫靳寄漁樵

閨詞 二首

芳菲春色滿樓臺人在天涯去不回
自倚雕闌看蛺蝶微風吹送落花來

其二

秋到空階一葉飛
邊庭何處雁來稀
香閨日日愁無賴
月下寒砧又擣衣

讀王元美弇州集

游生落魄氣偏粗
散髮扁舟下五湖
一自文題元晏後

太沖名已重三都

歲暮偶成

溪上柴門晝不開
問奇誰為歲寒來
黃昏獨坐蒲團靜
隔院微風送落梅

泊嚴灘

落落江湖老鷗冠
扁舟秋水正漫漫
吾生可是羊裘客
垂釣還來七里灘

朝雲墓

為雨陽臺去不還孤墳寂寞委空山
禪林舞袖當年事啼鳥春風一夢間

舟次懷人

山隈水曲抱烟嵐露月霜風酒半酣
夢裏懷人心切切梅花一片下江南

題梅

殘雪未消片月斜美人林下鬪豪華
淡妝疑自羅浮出占得春風第一花

春暮即事

飛花片片下溪橋
柳外鶯聲百轉嬌
晝靜柴門人不
到
新詩隨意寫芭蕉

題梅

冰霜滿眼歲將殘
萬木蕭條不耐看
漏洩江南春信早
一枝初破雪中寒

送姚巽卿

與君攜手思悠悠
此日那堪賦遠遊
莫道他鄉無知己

酒人何處不登樓

和鄭給舍七夕對雨

二首

凌波空負隔年期
河漢相望雙淚垂
纔到新秋悲宋玉
巫山賦就雨初和

其二

年年玉渚駕晴虹
今夜雙星黯淡中
淚灑霓裳收不盡
隨風輕著蓼花紅

春園即事

四首

蛺蝶隨風過短牆
隣家春滿百花香
南牕榻得黃庭罷
笑倚闌干看海棠

其二

睡起西窗日欲斜
溪邊汲水自烹茶
捲簾坐看雙飛燕
衝落櫻桃幾片花

其三

春雲不雨晝偏寒
翠竹臨軒長數竿
讀罷離騷無別事
自鋤芳徑藝幽蘭

其四

東風吹雨到江村落盡梨花晝掩門
柳外鶯聲春自轉
一庭芳草暗銷魂

贈汪魯狂

三首

桃花潭上舊汪倫
汴上相看冬復春
贈我琅玕長七尺
持歸東海一垂綸

其二

遨遊南北訪仙踪
老去還乘白嶽龍
莫訝荷衣香不散

三姑親贈玉芙蓉

其三

與君分手秣陵城
杯酒梁園感慨生
家住夷門人自老
有誰虛左過侯嬴

贈譚仲儻

四首

仙鳬曾向七閩分
愁滿衡陽臥白雲
今日夷門稱吏隱
不知誰是信陵君

其二

衡山歷歷秀芙蓉
紫蓋雲中未可從
見說藏書千古在
因君直欲跨飛龍

其三

風流傲吏有仙才
七澤惟看水一杯
遷謫無勞悲偃蹇
遊梁且上孝王臺

其四

邂逅同歌行路難
一尊湖海罄交歡
勸君莫擬三閭賦
今日無人似子蘭

贈胡安成

金甌縱橫見國工誰云篆刻總雕蟲但看一片昆吾鐵
切得刀圭吐白虹

題小山宗侯狎鷗汀

四首

高館新開汴水頭忘機日日狎沙鷗澄潭春動魚龍戲
截得珊瑚作釣鉤

其二

風雨扁舟混釣徒親人魚鳥若堪呼臨流更愛桃花色

肯載西施泛五湖

其三

豈是江潭賦卜居
眼中花木滿庭除
夜來還住青藜閣
著就劉家七畧書

其四

香生金粟桂叢開
樓閣參差近吹臺
欲問淮南鴻寶訣
倘容招隱小山來

謁伏羲陵

中原萬樹帶秋陰
陵寢蒼茫一氣深
龍馭杳然歸太始
蒼叢猶發白雲岑

白龜池

開闢相傳有此池
靈龜如玉兆昌期
若非太昊先天畫
萬古鴻濛總不知

游絃歌臺是尼父絕糧處

栖栖陳蔡道何窮
此地今留俎豆宮
日暮平林天籟發
絃歌疑是魯人風

登陳西城感淮陰事

會陳萬乘託南遊計縛功臣戶牖侯鳥盡弓藏何所恨
山東隆準薄千秋

經陳思王墓

八斗相傳繡虎才路傍石馬翳蒼苔洛神留得黃初賦
千載霓裳去不回

登蘓子由讀書堂

鏡中荷葉綠離離夾岼如雲楊柳枝不見風流蘓博士

高山猶自仰峨眉

銅雀臺懷古

孤臺突兀客初登
鄴下山河感廢興
花似綺羅人不見
惟餘春草滿西陵

遊仙曲

曾伴仙人夢綠華
隨風飛入上清家
別來欲寄金光草
海上青鸞隔綵霞

上趙王

朱邸如雲王氣中
鄴都形勝萬年雄
自從漢室分茅後
帶礪山河誓始終

其二

君王樂善漢東平
幾度褒章下玉京
端拱由來無一事
龍樓清夜望金莖

其三

桐葉分封不計年
漢家隆準更誰賢
小山却慕淮南道
招隱還歌叢桂篇

其四

芙蓉池上擅風流
今代宗藩古帝州
借問西園飛蓋夜
何人託乘月中遊

寄牛瑞卿

梁園春事近如何
風雨池臺入夢多
花壓闌干三徑好
求羊無日不相過

渡江

歲暮天涯雨雪多
孤帆此去嘆蹉跎
故園回首千山外

一片歸心逐逝波

元妙觀聞簫

月明仙院夜沉沉
鶴雀高巢古木陰
獨坐西樓鐘磬寂
玉簫吹起故園心

其二

扶藜笑指赤松家
踏破空中五色霞
縹緲何人吹玉笛
春風開遍武陵花

泗水逢雪

泗水風生古渡寒
長途無那客衣單
鬢邊忽點飛來雪
縱是瑤華不忍看

過蒙城

漆園為吏傲當時
世遠風流尚在茲
欲起斯人論物化
夢中蝴蝶許誰知

風猛不得渡淮薄暮投宿

朔風吹雪路漫漫
浪湧長淮欲渡難
今夜誰家堪寄宿
荒村犬吠一燈寒

賦得荆山玉示王汝存

荆山一望氣嶙峋
玉韞山中泣鬼神
莫怪陵陽當日淚
即今抱璞獻何人

豐縣道中

山東隆準起雄圖
西望關中定帝都
見說枌榆遺社在
未央還屬漢家無

詠史贈薛生

七雄爭競客如雲
珠履三千未有聞
不是賣漿人掉舌

却秦誰趣信陵君

為張大贈妓

柳顰鶯啼夕照間
黃金買酒醉紅顏
雙眉不用張郎掃
翠黛分明似遠山

西苑 二首

御溝流水出宮遲
花落花開春不知
惟有梁間雙燕子
看人樓上鬪腰肢

其二

涵碧亭臺蔽夕暉
渚花汀草靜相依
青鸞自是仙家鳥
只在瑤池水上飛

懷徐大驚鴻

新詩字字巧春蠶
墮馬妝成白玉簪
我住三洲流水曲
幾回子夜夢江南

懷長干恩公

六朝梵剎半金陵
誰得頭陀最上乘
雪裏攤經花不著
文殊原是五臺僧

春日即事

東風吹雨晝生寒，獨鎖柴門午夢酣。
花下銜杯拚潦倒，不妨人作酒徒看。

秋日題林學士菊花園

門垂五柳帶閒烟，栗里風流屋數椽。
人在南山秋色裏，一樽醉殺菊花天。

過釣臺

羊裘曾臥白雲間，烟水蒼蒼去不還。
回首雲臺俱寂寞，

至今人說富春山

秋日題紫雲樓

為愛元龍百尺樓
登臨氣壓萬峰秋
開尊醉殺青天月
一片銀河欲倒流

其二

海上羣峰列翠屏
樓開霄漢德為星
條然一笑天風起
織女機聲入夜聽

題白雲樓有懷

六首

檻外芙蓉插漢斜登樓似駕五雲車夜來北望星辰近
欲向空中摘九華

其二

高樓上逼斗牛寒何事伊人日倚闌最是千秋堪灑淚
紫雲山作白雲看

其三

檻外千峰擁翠來萬家烟樹望中開主人不淺登樓興
對月頻傾綠酒杯

其四

面面青山入畫圖
閒來與客醉屠蘇
銜杯笑問樓居者
月裏霓裳竟有無

其五

徙倚樓頭望翠微
晴霞片片鎖柴扉
醉來欲乞天孫錦
製就仙人五色衣

其六

風流原不減孫山
百尺樓中日往還
笑滿乾坤人不見

鳳凰深駐白雲間

溪上懷姚明府

溪頭新水到柴關
白鳥忘機自往還
日暮懷人高臥處
數椽茆屋九華山

送林太史之京

三首

題柱才名歲月深
風流誰不羨詞林
趨朝偏得君王寵
金馬無勞嘆陸沉

其二

薊北遙聞長樂鐘
金莖秋色露華濃
東南不盡瘡痍淚
獻納還看動九重

其三

前驅駟馬出青山
鳴佩初隨鴈鷺班
賦就長楊曾諫獵
漢廷簪笏侍龍顏

鄱陽湖歌

赤烏日日下鄱陽
十萬樓船殺伐張
一自鯨鯢先授首
東南無處不梯航

題鄭兆念采精舍

高齋讀罷思飛揚把酒花間日正長最愛君家書帶草
青葱似染綵毫香

送鄭士亮遊吳

三首

江上桃花春水生孤帆遙下闔閭城杖頭一醉吳姬酒
清夜還歌白苧聲

其二

建業斜峰入望遙行邊劍氣倚青霄鳳臺上青青草

幾度題詩弔六朝

其三

俠氣縱橫結五陵扁舟到處興堪乘江東不少豪華客
惟有蓴鱸憶季鷹

別許元復

閨門楊柳散秋陰斗酒相看一片心日暮江頭乘舸去
寒山回首白雲深

桃葉渡別顧君友

酒滿秦淮花滿樓春風吹動木蘭舟不知陌上千條柳
曾綰離人一片愁

寄曹參軍

二首

白雪飛揚郢調高風流妬殺五陵豪浮雲較與秋雲薄
且對吳山擬反騷

其二

結客談兵幕府才蹉跎宦跡轉堪猜獨醒總為風塵忌
湖上蘭橈醉幾回

送方子充司理宜陽

奉檄西行過柳州
獠猺拋弩拜君侯
訟庭吏散枕榔下
題遍新詩葉上秋

咏史

不見年華逐水流
蛾眉爭寵日生愁
相如縱有千金賦
買得春風不白頭

寧海晚眺

海上晴虹駕作橋
雲連蜃氣望迢迢
三江日暮濤聲起

不數西陵八月潮

春日留雲閣晚眺 二首

東山高閣迴凌雲人倚雕闌醉夕曛
春樹萬家看不盡
隔林清磬一聲聞

其二

白雲深處瞰滄溟有客憑高醉不醒
脾睨城頭低落日
飛來蘿月數峰青

江口道中

路旁芳草正萋萋
遊子朝來別故溪
回首壺公魂欲斷
前山又聽鷓鴣啼

客中對月

客舍黃昏獨倚闌
月光一片望中寒
應知此夜深閨婦
腸斷蛾眉不忍看

泊水口懷亡友林制成

扁舟曾共謁承明
十載重過感慨生
溪上獨憐今夜水
潺湲猶作去時聲

送林廷詔之廣西

三首

少年詞賦擬凌雲
嶺外愁為兩地分
日聽猿經古墓
且將雙淚弔劉蕡

其二

迢遞關山獨送行
炎方望斷瘴烟生
伏波古道看銅柱
三尺吳鉤箭裏鳴

其三

遊子天涯淚濕衣
相逢無奈又相違
倚門白髮千山外

覓得丹砂及蚤歸

雨中溪亭即事

一溪春水綠平橋
野老臨流酒一瓢
多少新詩吟不就
東風吹雨滴芭蕉

真州寄張士馨

江城楊柳綠毵毵
客舍長歌酒半酣
寄語金陵遊俠子
春宵無夢不江南

夢園菊離離起而有感

白水塘邊舊草萊十年三徑鎖蒼苔
寒花解得人歸意昨夜分明入夢來

青溪舟中夜雨

雲掃南山錦石寒孤舟何意滯江干
夜來聽得蕭蕭雨疑是桐廬七里灘

其二

新安流水下青溪寒雨孤舟暝色迷
此夜斷腸吟不得南山又聽鷓鴣啼

送詹淑正還新安壽母兼同顏舍人質卿同登太

山 四首

黃山山上削芙蓉十二樓臺紫氣重春酒如澗將母去
何須仙掌露華濃

其二

婺星光映五雲車花裏裁班進紫霞況是軒轅峰下住
容城分得竈中砂

其三

東望名山黛色開
鳳池有客共登臺
白雲一片封中起
如帶黃河萬里來

其四

幸舍長歌一蒨緌
飄零漫自客幽州
扁舟歸下詹何釣
懷刺無勞謁五侯

富春舟中

寒雲落木晚蕭蕭
人與孤舟對寂寥
忽見西風吹五兩
月明還趁浙江潮

小湖枕上

萬壑濛濛霧不開
扁舟夢逐故鄉回
惱人最是灘頭水
夜半潺湲帶雨來

馬上即事

萬壑春流瀉海門
人家多住綠楊村
花飄馬首如紅雨
何處聽鶯不斷魂

蒜嶺雨中

雨來馬上撲征衣
芳草萋萋去路微
況是江村寒食候

鷓鴣啼處亂花飛

囊山遲郭士龍不至

尋僧野寺不知還
秋色藤蘿正可扳
不見遊仙來郭璞
緇衣何處負青山

贈無著上人

為愛名山入武夷
浮雲縹緲更何之
五臺山下棲禪處
種得菩提樹一枝

晚度仙霞嶺有懷

楓林霜冷葉初斑
鳥道行人返照間
忽見南鴻雲裏度
為誰回首九華山

保安道中懷顏廷渠

青山歷歷半丹楓
人在天涯各轉蓬
不念無諸城下別
五湖明月好誰同

江郎石

凌雲鼎立勢亭亭
曾是三峰劈巨靈
欲跨飛翰臨絕頂
空中手摘白榆星

清湖館中別諸弟還鄉

湖海相逢落魄年，汝歸故國我風煙。
臨歧且盡壚頭興，莫說天涯乏酒錢。

清湖夜雨

歲暮淒涼雨有聲，依依客舍緩行程。
高樓夜冷衣偏薄，擊柝愁人到五更。

蘭溪舟中懷吳元瑞

吳山山下一逢君，五載鴻書杳不聞。
今日扁舟過潑水，

一尊猶自隔青雲

懷吳隱士

少君清淨道家流一別新都忽兩秋
欲問巢雲空谷裏千峰落日倚孤舟

嚴瀨舟中誦姚巽卿贈別詩有世路危於七里灘
作此寄意

讀罷新詩惱客魂人情反覆未須論
清冷依舊嚴陵水日夜東流望海門

射陽夜泊

扁舟蕩漾逐飛鳬湖上春濤薄
孟諸不識驪龍何處睡
飛來片月似明珠

那叱磯

江上徵兵赴國門石城龍鬪不堪論
一時魚腹千秋淚
不獨懷沙弔屈原

謝公墩同周文美張子明九日作

九日登高菊未花銜杯共倚白雲斜
豪華六代俱銷歇

依舊青山屬謝家

圯上吟

欲報韓仇不顧家中原
逐鹿亂如麻若非圯上傳黃石
滄海空椎博浪沙

經沛中作

城池寂寞舊山河
赤帝歸來萬乘多
龍去鼎湖無日返
大風猶唱沛中歌

淮陰祠

莫怪留侯慕赤松後車雲夢縛相從至今嗚咽淮陰水
空恨當年長樂鐘

春愁

芙蓉帳裏鬱金香梳罷雲鬟試綺裳誰道春愁花不解
飛來額上鬪新粧

賦得西枝室

少結茅庵曲水傍齋心日夕禮空王一枝分得菩提樹
種得旃檀片片香

李伯承西園催菊

竹影參差夕照斜，不知秋色在誰家。
葛巾倒著東籬下，幾度銜杯問菊花。

題陳子卿此君軒

陳翰臣字子卿，宗伯肅菴先生長君也。

氣壓元龍百尺樓，攤書偏愛竹脩脩。
有時笑倚嬋娟月，一片西山翠欲流。

淮陰城下作

春草萋萋楚水流，天涯日暮倚扁舟。
淮陰葬地今何在？

年少紛紛覓拜侯

題冶城吳道士竹房

牀頭一帙五千言竹裏柴扉晝不喧
酒似桃花春似海避秦何必武陵源

哭五君

壬午歲余遊吳入燕與五君間別乙酉
歸里中則五君相繼地下矣感而賦之

一曲淒涼薤露歌
賢人眼底漸消磨
所嗟不是龍蛇歲
湖海歸來涕淚多

鄭觀察茂

字士元嘉靖癸丑進士吏
科給事中河南按察使

東山杯酒惜離羣
此日生窮奈哭君
依舊南湖春草綠
鷓鴣啼處不堪聞

戴太守科

字朝賓嘉靖丙辰進士
戶部郎中廣州知府

木蘭陂上白雲多
淚滿當年舊薜蘿
誰道扁舟堪盡興
壚頭今已邈山河

林侍御史休徵

號石海

秋風驄馬別燕山
采藥歸來合閉關
一叱神羊飛不返
空餘䟽草落人間

黃博士衮

字補甫萬歷丁丑
進士國子助教

文章如錦一氈寒服食誰傳九轉丹憶醉紫陽山月下
故園此夜對誰看

柯明府茂竹

字充勲官授
海陽縣知縣

才子為郎製錦新琴書不解橐中貧丹成便爾飛鳬去
愁殺東籬漉酒人

七夕風雨有懷

無邊風雨夜蕭蕭牛女何曾渡鵲橋別有愁腸眠不得

隔窻欹枕聽芭蕉

喜鄭拱元見過

谷口風流鄭子真興來海上問波臣
銜杯恰對三洲月白首相憐有幾人

醉後題堯衢酉室

去年尊酒對花朝今日重來破寂寥
掃壁題詩人已醉一天秋雨暮蕭蕭

雨夜宿文蔚齋中

交情誰復似芝蘭一室相將擁鵷冠
坐對西窗頻剪燭
芭蕉葉上雨聲寒

題可秩書齋

四首

衡門背郭草堂清
書草參差繞砌生
試看青藜分太乙
夜闌讀易照寒檠

其二

名家舊學起青箱
四壁圖書白日長
莫怪城頭雲五色
一庭花染綵毫香

其三

檻外芙蓉插漢斜
登樓直欲採三花
客來不盡論文興
把酒空庭想月華

其四

名花如綺傍雕闌
小徑烟花竹數竿
讀罷玄經無別事
倚闌一曲月中彈

孤山社燕集

二首

湖上晴雲散綠波
六橋款乃起漁歌
孤山此日開詩社

金史卷之三
卷三
杜若洲邊白鳥多

其二

春盡平林路轉紆
青山如黛錯行厨
坐中別有風流客
將酒花間酌小蘇

懷顧道行

風流誰似虎頭痴
湖海相逢未有期
此夜孤舟看片月
垂虹橋畔咏新詩

檣李舟中題扇頭梅花寄程君衡

春風披拂柳如絲
橋李舟中獨酌時
寫得羅浮春一片
寄將江左慰相思

吳道士招余館中

二首

元館無塵紫氣多
相逢偏愛老婆婆
黃庭寫就償留榻
不似山陰換白鷺

其二

一室棲遲淡世情
夜來却聽步虛聲
他年並駕緱山鶴
與爾逍遙謁太清

集徐

秦淮春水漲桃花簾幙輕寒燕子斜一曲洞簫雙鳳下
月明人醉莫愁家

題潭中書亭

一庭春色報芳菲玉女驂鸞采秀歸可是三花分少室
天香夜染綠羅衣

題詒穀堂

二首

名家舊出紫雲溪卜築金陵漢水西不比烏衣王謝宅

堂開貽穀燕長棲

其二

堂開白下近長干
庭畔春風長玉蘭
奕世相傳蘋藻在
文垂片石望中看

贈周服卿花竹圖

興來濡墨據胡牀
花竹叢生百和香
若使臨粧窺彩筆
喬家能不妬周郎

春日得程君衡書却寄

江東雲樹望中迷
雙鯉長勞尺素題
若問天涯遊子意
始蘇臺畔草萋萋

別黃貞甫

客舍憐君日日過
故人回首興偏多
孤舟無那東風別
芳草萋萋遠水波

過吳江不及晤周繼美叔宗兄弟悵然有懷

吳門邂逅歲將殘
春水扁舟會面難
却想君家棠棣樂
虹橋明月帶愁看

題江養化亭

山當睥睨水滌洄十畝園林背郭開
坐上雲霄看不厭
壺公萬疊送青來

過七里灘呈友人

物色空勞下漢庭羊裘歸隱萬山青
君看千載銷沉後
帝座何如一客星

其二

繡嶺參差五月寒
桐江積雨水漫漫
臨流欲借東風便

一片帆飛七里灘

蒜嶺道中逢鄭襄甫偶成

三尺龍泉暗斗牛如何也逐少年遊
請看雙鬢皤如此厭說青雲四十秋

館中聽雨

踈燈孤館影悠悠素髮蕭然挂蒹葭
枕上忽聞楓樹雨夢魂欲破海東頭

宏渡道中報晉安諸君子

秋風驛路半陰晴瘦馬千山不耐行
截得珊瑚竿數尺釣龍欲傍越王城

宿常思嶺酒家

雨歇平林夕照斜停車一問酒人家
憑誰共作長鯨飲乞得青門五色瓜

常思嶺早行

秋草萋萋秋露濕烏道崎嶇行不得
我欲乘風借羽翰朝遊三島暮北極

題江氏亭 三首

檻外芙蓉插漢斜
紫荊花映碧窗紗
登樓一笑星河冷
揮手空中摘九華

其二

名花如綺倚雕闌
曲徑蕭然竹數竿
草就玄經無別事
南華秋水月中看

其三

一庭春色散天香
花萼相輝白晝長
氣似垂虹文似錦

風流原不墮江郎

題霞林林氏別業

二首

南華讀罷倚雕闌
十八娘家荔子丹
瑪瑙盤中珠錯落
文園消渴好加餐

其二

羣峯矗矗翠爭奇
草木風雲變四時
不待操蛇神謁帝
太行王屋眼中移

采石秋夜

秋色西來采石高
謫仙祠下水滔滔
嬋娟一片澄江月
曾照當年宮錦袍

登謝公墩

王謝風流自永嘉
雙攜歌妓鬪豪華
綺羅不見春歸盡
惟有東風送落花

秋日遊山

天馬西來接九華
樓臺十二俯人家
東鄰酒熟南山近
可許柴桑醉菊花

秋日題鄭明府菊花園

牀頭酒熟百花香不必吳姬勸客嘗
花下與君拚潦倒酒徒早已屬高陽

題畫

千山歷歷水悠悠江上風來六月秋
最愛滄浪堪濯足柳陰繫著木蘭舟

九日登蒼翠閣值鄭九攜酒至

秋風搖落客天涯徙倚高樓夕照斜
縱有白衣來送酒

依然不見故園花

題姚明府亭

二首

名園花竹影參差
招隱長歌絕妙詞
醉倒接籬醒不得
風流還似習家池

其二

光祿池亭向水開
郎官青鬢賦歸來
桑田滄海須臾事
竹下何妨數舉杯

贈馮季良

五首

一謝侯門似客卿志遊翰墨嬾逢迎涉江采得芙蓉佩
贈爾臨風度赤城

其二

會稽東去不辭貧為愛蘭亭寄此身笑問若耶溪上月
即今誰似浣紗人

其三

燕市時時過酒徒問余何事混江湖於今供奉維摩室
不是馮家舊子都

其四

東海黃郎氣逼天
漢庭詔獄黨人年
朔風吹墮燕山雪
藉爾晨昏進索饘

其五

誰字馮生曰季良
東甌才子漢仙郎
漫疑身帶青蓮色
分得阿耨九品香

送陳爾瞻之豫章

爾瞻白雲先生也

老去王門尚曳裾
豫章西望思躊躇
懸知夜住青藜閣

校得劉家七畧書

蘇道人壽詩

市隱忘機似野鷗
吳山高士最風流
他年定跨蘇耽鶴
直上仙人十二樓

出門志感

別却牀頭綠綺琴
出門何處覓知音
一從玉斧蓬萊去
采藥猶存未死心

林草亭北郭別業同石陳諸君子作

數畝池亭背郭開
西方爽氣逐人來
相過不為耽奇字
文似相如諫獵才

其二

花垂三徑閣臨池
愛客開尊但賦詩
乘興何妨偏潦倒
白蓮社裏笑攢眉

其三

書藏二酉意如何
家世相傳掇玉科
翹首青霄雙鳳下
文章五色較誰多

其四

羣峰如黛照疎櫺此地由來聚德星
濠濮親人魚鳥在松風謖謖更堪聽

題林中丞柳橋別業兼贈潔甫公子

林中丞念堂公也潔甫其

長君

中丞臺館抱溪流載酒頻過杜若洲
一自吳門千騎散至今花鳥不勝愁

其二

辛夷花發艷陽天別業風光似輞川
貫酒壚頭春欲暮
飛花何處不堪憐

其三

孤亭風雨長蒼苔山似飛凰擁翠來
世事尋常歸荷鍾
不妨潦倒日銜杯

贈林潔甫

公子輕裘若不勝承家豈忝大中丞
但看十日平原飲
意氣粗豪壓五陵

訪朱在豫不值作此投之

雲橫海上日初斜，倚杖偏尋處士家。
不識淮南秋色裏，角巾何處醉黃花。

九日同友人登東山

四首

城陰秋色帶蒹葭，載酒登高覽物華。
漫學龍山輕落帽，白頭如雪笑黃花。

其二

佳節登臨興不孤，相將花下劇呼盧。
詩成戲馬千秋事，

容易逢人結酒徒

其三

青女飛來九月霜
尊前含笑佩萸囊
自知不是柴桑客
也向蓮花禮法王

其四

蕭蕭木葉下晴空
坐笑樓臺醉晚風
回首當年兵革裏
夜深鬼火泣寒蛩

讀余氏七賢傳

七賢皆從
朱子遊

七子高風足討論先朝並及紫陽門
但看虹井雲塘色
吾道東南一派存

塘雲四景為余鞠夫題

方塘一鑑

水似滄浪好濯纓先朝曾說五雲生
至今不染風塵色
日月雙丸鏡裏行

曲水雙環

雙流如帶抱孤村中有千年國族存
見說塗山遺澤遠

涓涓何處不崑崙

鶴山獻秀

一丘一壑綠雲間
望裏松蘿日可攀
不是仙人乘白鶴
誰知此地是緱山

象阜鍾靈

喬木如雲倚畫圖
鬱蒼佳氣接天都
共言地似西來象
西域冠裳似此無

寄吳任熙

長橋月白似垂虹
倚棹愁聽落木風
遙想三蜚山下客
竹林尊酒與誰同

答安懋卿

詞賦縱橫重兩都
江南才子起菰蘆
何來題鳳空歸去
一夜柴門月色孤

舟中望桐廬縣有懷

青山歷歷隱人家
掛席中流海日斜
依舊桐廬江上縣
經過不見木奴花

嚴州懷古

飛鷺疊疊鬪芙蓉
雨裏看山色更濃
高卧羊裘人不見
釣臺惟有白雲封

過龍游懷鄭性之

遠樹臨江雨乍晴
三衢東去片帆輕
故人何處猶彈鋏
不作君家谷口耕

望江郎山口占

空中鼎立石為朋
萬古崔嵬不可登
莫是三峰移海島

至今高出白雲層

燕中集西寧侯邸第觀菊

一曲涼州振木飛五陵遊子夜忘歸
陶然醉殺黃花下月滿壚頭露滿衣

戲答見嘲醉後墮車之作

霞村痛飲類猩猩蘆埔墜車却毀形
口吃不堪仍嗜酒一尊誰載子雲亭

遊仙曲 二首

九子金鈴出九龍流蘇雜綵感芙蓉東風不管花無力
吹滿昭陽第一宮

其二

何年彩鳳下丹霄一派清音入九韶自是封姨晴作籟
錯疑秦女夜吹簫

遊仙詞

桃花流水赤城山當日劉郎去復還若道不如天上好
何緣二女憶人間

高帝斬蛇劍

拔劍長驅萬里心
蛇分鬼母哭空林
元康武庫流為火
火德將無屬卯金

清夜遊西園

水殿香風吹綺羅
金樽綠酒漾微波
西園詞客陪雕輦
不醉其如明月何

少年行

繫馬垂楊問酒家
當壚少婦貌如花
不知蕩子誰先醉

笑解腰間玉辟邪

試劍石

劍術何年壓九州
輕將磐石試吳鉤
燭鏤不賜鴟夷子
臺上何因麋鹿遊

望夫石

峭壁峻嶒似削成
行人遠眺淚猶盈
無情原是蕩家子
空作望夫石上名

咏嬋娟

榕葉陰陰送晚涼
溪流曲曲似瀟湘
堦前一片嬋娟月
顧影何人不斷腸

海月亭

草閣風吹海月涼
荔枝初熟夜聞香
美人遙隔秦淮水
何處壚頭典鷓鴣

題畫

野老科頭一葉舟
閒看雁影帶雲流
蕭條蘆荻秋江冷
何處披簑下釣鉤

途中呈立儒叔

諱應奎號文
峯北京鎮撫

小阮琵琶信陸沉
江湖何處覓知音
步兵莫作窮途哭
歸去山中嘯竹林

長汀逢黃生贈之

叔度相逢鄞水前
山城日落起孤烟
微名奔走成何事
不向山中結白蓮

經黃伯固墓

名鞏仕職方郎正德南巡上疏極諫
並誅江彬以謝天下廷杖瀕死得甦

嘗曰人生仕至公卿大都三四十
年惟立身斯千載不朽世之人顧
舍此事彼何也

古墓荒涼草色新
況逢寒食倍傷神
誰憐地下魂無主
原是先朝諫獵人

送友人下第歸新安

文章何事誤斯人
消盡黃金白髮新
馬上不須頻下淚
新安秋水待垂綸

蘇公堤

湖邊芳草白淒淒
烟鎖六橋水拍堤
千古風流人不見
鶯聲恰恰為誰啼

夜過丹陽

楓冷江臯九月霜扁舟一夜過丹陽
蘭陵美酒知何處欲向壚頭典鷓鴣

哭張管文

運籌久矣聞黃石辟穀飄然訪赤松
却恨吟魂招不得只留詩草在江東

寄所思

客窻風雨夜深沉暗裏懷人思不禁
爪步寒潮日日下

誰將錦字寄同心

過曹娥江

剡曲青山歷幾重
曹娥江上夾芙蓉
荒碑寥落千年事
更有何人問蔡邕

會稽舟中

雪滿江頭路已迷
萍踪何事更淒淒
欲探禹穴懷司馬
一夜扁舟入會稽

青山阻風

九月江南風倒吹青山山下泊舟時射潮安得錢鏐弩
使我孤帆向日披

上蒼峽

歲暮下灘春上灘年年高著遠遊冠扁舟誰識鴟夷子
滿眼風波醉裏看

贈醫士二首

城市無營一草廬山中採藥度居諸若非仙術窺鴻寶
門外何多長者車

其二

豈必桃源遠避秦
市廛何處不藏身
懸壺別有無窮思
欲種杏林萬樹春

武林道中懷吳翁晉

錢塘樹色染霜黃
郭外西湖似鏡光
翹首名山天自遠
美人多在白雲鄉

發豫章

大江秋水一孤帆
萬里西風冷布衫
不是南州無下榻

青山生計託長饒

贈鍾羽脩

二首

片石移來織女磯
彩毫題處濕苔衣
郢人自挾陽春調
莫怪尋常和者稀

其二

輞川勝事幾人同
濃淡分明奪化工
乞得仙厨圖一幅
買山何必學支公

雨中懷郭宗舜李千運

溪流昨夜長漁磯雨裏柴門暑氣微何處仙舟逢李郭
水田雙鳥背人飛

壽蔡母為希孔作

星臨婺女貌如花綵服蹁跹進紫霞莫訝雕盤麟作脯
麻姑元降蔡經家

夏日館張以正以濟餐秀園留題兼呈吳宗甫

冰溪溪上采芙蓉之子何勞問赤松客裏淒涼無別物
臨風一笑解雙龍

其二

冷然流水調孤桐誰識南來五月風
賴有知音頻問訊
一尊長醉月明中

其三

幾回欲去思躊躇為愛蓬蒿似隱居
即使橋邊雙進履
袖中豈有一編書

其四

別館清冷鏡裏開更逢美質數銜杯
豫章西去秋風起

遲爾縱橫作賦才

哭林中丞二首

中丞諱潤號念堂嘉靖丙辰進士居御史疏劾鄔懋卿以副都權理

鹽政苛索至數百萬道路供費以億計又劾嚴嵩受賄請拓府第開地脉以當王氣又劾世蕃僭逼無上招亡命集江干疑有非常乞磔之市以消禍萌嚴氏伏誅朝野肅清皆公力也

埋輪都下舊知名當道豺狼敢橫行白馬忽隨丹旆去
風雲慘淡闔閭城

其二

星隕轅門上將才延陵掛劍重堪哀故人不盡羊曇淚

忍向西州問草萊

輓陸夫人

四首

湘靈鼓瑟渺何之一片愁雲殢九疑總為人間塵滿鏡
鐙鐙佩向月中移

其二

翡翠光搖赤水珠長歌一曲鳳將雛孤飛却向瑤池去
欲借還丹竟有無

其三

錦瑟調來五十春飄然駕鶴出風塵使君海上懷明月
捐佩猶疑漢浦人

其四

漢口機停織女聲黃姑何處望鸞輶郡齋楓葉蕭蕭下
不盡清商萬古情

懷陳司馬孔震

四首

虹橋高駕鎖延津短髮孤帆笑此身雲暗千峰流水咽
雙龍未合倍愁人

其二

仙蹤何處醉屠蘇
囊裏長懸五岳圖
獨倚扁舟懷下榻
九峰山外白雲孤

其三

大橫山色望中青
飄泊偏憐水上萍
欲問杜陵投轄興
老來嗜酒一猩猩

其四

五湖曾是學鴟夷
到處輕賁任所之
安得雲窩陪杖屨

釣天樂奏自明時

題鳴臣林明府園亭

三首

山中雨露長松筠十畝園林寄此身
莫問桔槔勞俯仰
忘機原是漢陰人

其二

白髮逍遙不計年興來時咏考槃篇
濯纓池上寬垂釣
魚在濠梁樂已全

其三

宅邊五柳似柴桑
籬下黃花晚更香
自有白衣來送酒
南山秋色醉斜陽

采蓮曲

四首

雲鬟初綰玉搔頭
湖上相將弄小舟
纖手接來花並蒂
半含懽笑半含愁

其二

荷葉離離帶暖風
香生菡萏玉顏紅
嬌歌一曲鴛鴦起
多少殘霞落水中

其三

晚風吹棹夕陽邊
花媚羅裙倍可憐
忽見西陵生片月
弄珠神女下長川

其四

采芳越女鬪蛾眉
顏色如花鏡裏窺
蓮子摘來心自苦
更饒不斷藕中絲

咏荔枝

青籠攜來荔子丹
小姬剥出水晶寒
一餐已解文園渴

金剛經卷三
不羨仙人承露盤

望廬山

彭蠡茫茫混太虛中天紫翠拔匡廬高僧舊住東林寺
寺裏蓮花好在無

象教精舍為孔陽宗侯作

齋心日日禮諸天香滿梅檀護法筵不獨莊嚴窺妙相
空中舍利照金蓮

送金子魯考滿

四首

秉鉞登壇寵聖朝功成海宇報清霄幕中擬議多奇策
掃盡烽烟罷戍遼

其二

鵲印龍韜靜海方東南處處樂耕桑請看一切便宜令
日月高懸萬里光

其三

折衝樽俎擁三軍攬結英雄更好文試數漢家麟閣上
一時將相幾如君

欽定四庫全書

詩教連言身
卷三

八十四

其四

運籌海上擁長鯨
繡斧封章謁聖明
瞥見黃麻三殿下
趨朝劍履帶春行

馬上見太行山

黃金柳色及春回
雲散朝歌睥睨開
馬上春愁消不盡
太行一片自西來

燕臺驤首題贈方元素

倣儻權奇萬里才
無人不道是龍媒
長鳴一向燕山去

重上當年郭隗臺

贈熊生 二首

雕蟲篆刻鬼神驚
混迹何年隱姓名
不是司空稱博物
誰知龍劍在豐城

其二

金璫琳瑯片片裁
逢君初出楚江隈
狂夫自分詩名薄
藉爾風斤運九垓

贈楊素虛

誰為湘纍費苦吟
楚人高誼比南金
即今不盡忠魂淚
猶是當年請死心

戴朝賓四山亭

四首

四山環抱着孤亭
中有高人醉復醒
一徑蓬蒿車馬絕
牀頭草就太玄經

其二


亭俯溪流白日寒
鷺鷥輕下使君灘
何須夜泛山陰雪
五月扁舟興未闌

其三

五嶺風流一使君飄然林下鹿為羣醉來不枕山中石
別取支機臥白雲

其四

南海歸來興不孤高陽濁酒命吾徒一池春水葡萄色
肯與西施泛五湖



薛荔園詩集卷三